

# **Timotirhu barkof gontwat**

## **Porr dwandfakhato htafmot**

### **Barkof kfo nuhas mrokfom**

Timotir damiagenrn Jisasr rihikakmor. Timotir Galesia profinsko yorhwa taun Listra thofer. Rorhu yifemr Grik thofer. Mmemtnne Juda efkott. Timotir tohmohat Porr yaknimoarr misin hingrneft hiyau nuhas htasmourr. (Nd mrokfot htikfot Aposer 16.1-3). Timotir toh hanyhato ka kto taun Efesushu Kristenroh bro tohak yimar htamomr. Nd hingrneft tohetrn Porr ndar gontwat wandfamorr.

Barkof mrokfom afo kfo kars kfo tebos mrokfom hemorrh. Kfo memor, “Yo ni, ni hatohwa Kristen met yindarim wayukatoh marnyaf hanywanm. Wom yimam nieruhann mfrnheh bonhehruhatmm rroh mrokfo yuhann mitohnirahm. Nd yimam ndar bbinyosothu tamoh tamohht hti thombat kfo kangm fasohem. Yo wom mrokfot kfo kangm wom wom mur yemrot ye juha. Yo tuhan yak duha.”

Ndm inji kfonomormn tfit sios hingrnefroh toh yukatohhato yak hta bohta yuhann kfo pthamor. Yo sios hingrnefroh hingrnayuk yimarooh yak hta yuhann kfo pthamor.

Wuroh mrokfome Timotirhu toh yuhann kfomor. Kfo memor, “Ni Timotin Jisasrhu hingrna yima tohneft, tu dborioh hingrna yima tohkfot.”

---

**Ni Timotinhu nefm yo sioshu tuhan yindariroh nefm duka  
marnyahato tamoh tamoh nefenm nakfot.**

*(Sapta 1-6)*

**1** <sup>1</sup>Na Pora, na Krais Jisasrhu aposera. Nann ndar gontwat wandfiwann ni Timoti. Bi fasoh yimarhu tirm ruhetnom yakmo Nkifrar yo nom rhu yukatoh darwon hasiwa yima Jisas Kraisr, rofhu tngtpno na aposer hingrneft yakhato hingrnnewant.

<sup>2</sup>Timotiye, ni Bro Nkifrarhu mro-kfot hikwa yuhatn nantu yon mife. Nmoh Yifem Bro Nkifrar yo nmoh Nungothet Krais Jisasr yuhuwafhato

ninhu rhu nmbuham yak marnya bomarnyahekahtfn yima yuhur mirhurahrn.

### Kfo fura bofura mrokfom mong trohkfot

<sup>3</sup>Na Masedoniako yibon hanyneft-pno kfohemo mrokfotn kanga nd mrokfot tfit akfohiyann. Nanhu dukeft kanga, ni mirahn Efesus ahtanyant. Nd taun Efesushu Kristenm bi yimam yitamn mkfo yuhur nneh bonhehwatmm kanga afo Efesus watohkahnn nd yimam wakfo rafotwanm. Mirahm tfit wom nndoh nndoh dukefm nd taunthu Kristenm ahanyomm. <sup>4</sup>Mirahm nd nkifram harhu hawihnamo nkifra tndhm, yo nkifram niayuk frikef yuham tfit akfo tndh hik bohik hatohnomm. Nd nmbuhampno Kristenm tum tfit nakfo hamuh nakfo hamuhwom. Bro Nkifrar nhai hik marnyakahmr. Kraisrn rroh yima yuhum htahato ee Bro Nkifrarhu dukefr hikrahm. <sup>5</sup>Na kanga rpattayukt marnyahato rpattayukt watohko. Mirahko nd yimaroh dukef yuhann ahiknom. Kraisru mrokfom yakitoh kihhato yima yuhum wutham rhurahm. Inji rhurahko, tuko Kristenko nayak marnyahato rpattayukt tohrahko. <sup>6</sup>Wom yimam nd kfia mrokfom myafho-nitamm tfit nd yafotha duha mro-kfomn hikwom. <sup>7</sup>Kangm, “Nd Bro Nkifrarhu boririfhut nomn kakitoh marnyewunom. Womm nomn kfo nuhasrahnomm.” Ndt kfo furewumt. Nhai rom Nkifra boririfhut hik marnyakahmt. Kangm, be wommn akfo nuhaskahtnom romn ahikmt.

<sup>8</sup>Bro Nkifrarhu boririfhut rot dboriohet. Be tu Bro Nkifrar kfomo yuhatn nd boririfhut hikneft, rot nhai mrokfom. <sup>9</sup>Boririfhut nhai toh marnyet yimaroh yak hta bohtayukt Bro Nkifrar htarmort. Nhai. Mrokfet yimarparoh yak duka tungunayukt htamort. Yimam boririfhut mhanyjbor-nanihato hammo bohamumiwaroh yak duka tungunayuket. Yo yimam Bro Nkifrar mong trohnihato fasoh fasoh nefm niwa yimaroh yak duka tungunayuket. Yo Bro Nkifrarhu nefm hti hhreknihato ndar bbinysothu nefm tfit hti yuhurwaroh yak duka tungunayuket. Yo yifammam waswa yimam yo mrokfo duha yimam frdbofn fura yo krjbowur furewaroh yak duka tungunayuket. <sup>10</sup>Yo ijom tonita yimaroh yak duka tungunayuket. Yo Sodomthu yimam namo nefm kanjo nayet yimaroh yak duka tungunayuket. Yo yimam wom yimam yak rikohnihato tfit rroh slefm yak htewa yimaroh yak duka tungunayuket. Yo kfo fura bofurayet yimam yo yimam wom fasoh nefm nahato tfit namhi bror htahato Bro Nkifrarhu yufat yuta fura bofuriwa yimaroh yak duka tungunayuket. Yo sios kfo yirmohwa mrokfom rhu hanitm tfit womm rom wom nndoh neft tfit riharhuhany ndhtet ndhtet net yimaroh yak duka tungunayuket. <sup>11</sup>Nd sios kfo yirmohwa mrokfomn gutnius kak hikwot. Nd gutniuskfot Bro Nkifrar nanhu tirtn htamotrt nann kfo ptha htfaswant. Nd gutniuskfot nd bruwohmr katiwa kanjo funa nanyjarwa

Nkifrar yo yimam kfo yuta hagrhiwa Nkifrar, rorpno nd gutniuskfot niamot.

### **Bro Nkifrar yuhuwafmotrr Porr, Porr kfo yindhormorr Bro Nkifrar**

<sup>12</sup>Nmoh Nungothet Krais Jisasr hingrna bbuiefr hemotra kfo yindhор-wanr. Nd tur hemo hingrna bbuiefr htihato dukamor nann nd rorhu hingrnefthu hingrnaneft. Ndnatpno na kfo yindhорwanr. <sup>13</sup>Na tafi rorhu hingrnefthu yarim fnahne duha na nda ror kfo garib bogarib hnamoahat, yo tamoh tamoh nefm na namoampno rorhu yima yuhenr muh wohne thunimoahat, yo faso faso kfo rindho borindho thumoahat, ror nhai nd na nayuk neft mhtiyakrmor. Nhai. Yuhuwafmora. Na namoa nefm ror hitimohat duka memor, “Ndr niwa nefm tafi na hti duka tunguna duha ndnetrn ndhtet nefm newurm.” Rorhu htiyeft inji htihat hifa yima yuhur niamotrr nhai yak tutfarmora. <sup>14</sup>Nmoh Nungothet Krais Jisasr tu mfro yuhuwaf mifhato nanhu yima yuhur kasinya-morr rorhu mrokfom hikhato wom yimampno nayak marnyahato rpat tohneft.

<sup>15</sup>Krais Jisasr ndar bbinyssoft fawihnamor nom fasoh fasoh nefm nayet yimanmoh yakneftn. Nd mrokfot tu kfo mif mif kfoyet. Yimam nd mrokfot wany yakiokfot. Na ndar yimayann fasoh fasoh nefm mfro nahato yiro fknemoya. <sup>16</sup>To na ndhtet fasoh nefm mfro hatohet yimaya, tamohmpno wayuhuwafmora? Memor, “Ror inji hti yuhuwafhato ayakkahta, yima bugam htirahmt na hifa yima yuhurpno fasoh nefm nayet yimam yuhuwafhato yekwa yuhat.” Rom inji htiruhamn rorhu mrokfom wany yakioruhamn toh nkifranirahm. <sup>17</sup>Ror toh nkifraniruha kinger. Nhai nohkahr. Yimanom nhai htikahnomr. Rorrpar Bro Nkifra mifer. Ndnettyn yiha yiha rorhu yufarpat bro yufat htakfot. Rorn nyngako htakfot. To be inji.

### **Fasoh nefm Timotir yukatoh duha**

<sup>18</sup>Nanhу yon Timotiye, wom kfo duka mrokfom kahukwann. Bi bingot ninhu nmbuhat bi profetm pthamomt. Na kfiwann nd profetm pthamo mrokfom ndm wayakitohtwanm yahrt tohyuk kfra inyarut kanjo. Giaman tisam niehato finji kfiwumn nd ni yakinohyuk kfra inyarum yakhato tawo tukfot. Nd kfra inyarut yakinohhato giaman tisampno yahrt watohtwant. <sup>19</sup>Mirahn Jisasr afrtrohanr. Jisasr yakinoh kihhato tu dborioh yima dukefrpno nd yahrt watohtwant. Yima yuhur mwofnnitwor tamoh nefroh naneft o fitoko yinyeft, ee btn sinyakfot. Yima yuhur kurhiwur, sinya duha. Tamoh tamoh nefm be sinya fura bofuraknihato na fura bofuraknirahnm to be tunn yoh raforahnt tunhu yiyuk yihotat. <sup>20</sup>Himeneus Aleksanderof to inji namotf Satanrpno rifak htamoyanf. Yimam inji yak gnngtatetmn nhai tfit Bro Nkifrar kfo garib bogaribruhatmr.

### **Rhu rifinyhato kfo bruttnaneft**

**2** <sup>1</sup>Rifinyhato kfo bruttnaneft, barkoft afo tuhan yindarim dukahato rroh rhu nmbuham kfo bruttnakfot. Tuhan yindarim tamoh dukefetem

o tamoh krhopetem ndm afo kfo bruttnakfot. Kto tfit tamoh tamohm kfo bruttna yindhorkfot. <sup>2</sup>Ndm inji kfo bruttnanihato tfit gafmann, kingm kfo bruttnakfot. Bro Nkifrapno kfo bruttnayetmn nom rhu mmohato Bro Nkifrar hti yindhora wa nefrpam yakitohhato hikrahnom. <sup>3</sup>Fitohtet fitohtet yimam yuta bugahato kfo bruttnefm, nom fasoh tkit bebt yakmo Bro Nkifrar hifa wany yindhor-wor. <sup>4</sup>Bro Nkifrar hifa yindhorwor yimaroh yufam kfo bruttnahato nd yimam Kraisru mrokfom wanyhato yakneft. <sup>5</sup>Rpa Nkifrapar korhr. Rpa yimarpas buha tohhato yima mifm yekwam Bro Nkifrapno brbo kak htewurm. Nd yimar Krais Jisaser. <sup>6</sup>Kraisr tu Bro Nkifrarhu dukef yuhath hikhato nmoh fasoh fasoh nefm rorn suh nanyormorm. Rorn suh nanyormotrm be nd Bro Nkifrapno iyiyuk yihotat yihotett rhumot. Bro Nkifrar nom tfit yak yibon bugetrn yihotat inji hingrnamat. <sup>7</sup>Na to nd ror suh nanyormo yuhathu mrokfothu kfo ptha nuhas htfasneftn nd aposer hingneft fak htamora. Memor, rorn rirhu arhuyuk yima tangim kfohi hanyrahram. Yima tangim wanyhato Jisaser hikruhamn tu yafohtet mrokfot yakitohrahram. Na kfiwa mrokfom tu mrokfom kfiwanko.

<sup>8</sup>Lotu yiham kmi kmim kfo bruttna-neft, na kanga, yindarim Bro Nkifrapno brbo frtkafhato tirm yura hta hanyhato kfo bruttnakfot. Nd yimam nhai wommpno nakfo hutt nakfo nna inji nakfot.

#### Dborioh nefroh naneftn tot tu metroh wondht

<sup>9</sup>Metroh wondh yuhat kfo ptharuha. Metm wondhneft mirahm be mfro tamoh tamoht yakhato awondhnom. Tmarim mirahm be mfro mrfau yukehato tmahrut tamoht yakhato hembonginahato tmarim awondh najugnamm. Yo mirahm gort o tamoht yakhato yimanyosfm awondh htanomm. Mirahm be mfro maru kfet hmbresham wiknahato awondh hta bohtanom. Nhai. <sup>10</sup>Metm kangm Bro Nkifrar ahiknom, dborioh nefm yakitohkfot. Metm nayuk dborioh nefmn tom tu metroh dborioh wondht. <sup>11</sup>Metm hifa yima yuhurpno nhowi rhuhato Bro Nkifrarhu mrokfom kfo ptha nuhasyuk yimarhu yinhitn rhuhato mrokfom yakkfot. <sup>12</sup>Nhai metmn yindarim yak hhrifnihato tfit romn tohhato yindarim Bro Nkifrarhu mrokfom kfo hta bohta-kfot. Ndt na nhai wofnkaha. Rom be nhowi rhuhato be wany yakitohkforpat. <sup>13</sup>Wawanyko, Adamr hingrnanihato Ift hingrnamat. <sup>14</sup>Nkifra tndht inji kfiwit, nhai Adamrpno tndhr mnannahato mnhehrmor. Nhai. Mettpno mfnahmotr rotn nd Bro Nkifrar kfoyuk kfo rafo mrokfot riyak htafnihato fasoh neft namot. <sup>15</sup>Metm rom be tumn yon hiyau hanyhato yiha yiha Kraisru mrokfom hikmm, yo rroh toh nmbuham rorhu tirtn htahato Bro Nkifrar kanjo ftohm, yo nd yima yak marnyanef fakitohmt, yo dborioh nefm fak hikmm, Bro Nkifrar tfit yakmiyakrahram.

#### Sioskfot toh yukatohyuk yimam tu dborioh nefm yakitohkfot

**3** <sup>1</sup>Na kfo mifwa, yimar kangr, sioshu toh yukatoh yimaya atoha, hifa. Ndt tu dborioh hingrnfef. <sup>2</sup>Nd sios toh yukatohyukrhu yau

nmbuham, toh nmbuham be yak teh marnyakfot. Nhai rorhu wom fasoh nmbuhat yimam wahti nkriyafokfot. Nd yimar be rpa metrpatpno tohkfot. Nd yimarhu yima yuhur yak hta bohtahato rorhu wiayauyau nmbuhat dukefmpno yaukfot. Womm yakhato hifa rika bukr yak htakfot. Rorn Bro Nkifrarhu mrokfom womm kfo nuhas bonuhasetr rhukfot. <sup>3</sup>Nhai nd yimar bupa bebm yehato kfo mmo bammokfot. Nhai nd yimar tamoh nefenm bmbri kah rifhur mfnahhato tir tuyaknikfot o finji nakni-kfot. Nhai wommpno nakfo befenm rhukfot. Hifa yima yuhurn tamohm nakfo ptha marnyakfot. Ror nhai be mfro maru dukefrn rhukfot. <sup>4</sup>Nd yimarhu yon tuhanm hifa hifa yak hta bohtahato rom rhu marnyakfot. Yonm be yifemrhu yinhitn rhu digr marnya-kfot. <sup>5</sup>Yimar nhai turhu yon tuhanm hti yukatohaf hany marnyakahrm, nd yimar nhai Bro Nkifrarhu sioskfot toh yukatohruhatrt. <sup>6</sup>Nd hingrneft tohyuk yimar nhai nfri Kristen yimarn nd hingrneft tohkfot. Nhai. Bi Kristen tohngotet yimarn nd hingrneft yak-hato htakfot. Nfri yimar nd hingrneft yakrahrt, to be turhu yufathu yura htaneftpno Bro Nkifrar tfit wahtarahr Satanr wahtamo kanjo. <sup>7</sup>Mrokfo hatoh hna duha yimar nd hingrneft yakneft, nhai mrokfom. Ndhet yimar yakettn to be nhai Satanru rugitn fkniruhatr riruh aruhuk yimam mrokfo bebm turuhatmm.

### **Sioshu hingrnanhoyuk yimam dborioh nefm yakitohkfout**

<sup>8</sup>Sioshu hingrnefm hingrnanhoyuk yimam Kristenmpno tu dborioh nefm yakitohkfout. Nhai rom hus tngtem rhukfot. Nhai rom wain bupam yehato kfo mmo bammokfot. Nhai maruham hmarsiyakt yakkfot. <sup>9</sup>Wutha yima yuhumpno nd tafont yak nriyafmo tu yafothet mrokfot, nd yimam yakitoh-kfot. <sup>10</sup>Kangko sioshu hingrnanhoyuk yimam ayaknom, afo yakhato htikfot rrroh hingrnefm. Tu hifa hingrna marnyewume ee btn nd hingrneft yak htakfot. <sup>11</sup>Rroh metm nhaf tu dborioh nefm yakitohkfout. Mirahm tihtrwonem akeutnom. Rorhu yima yuhur yak hta bohtahato rorhu wiayauyau nmbuhat dukefmpno yaukfot. Rroh rhu nmbuham be rhu marnya bomar-nyakfot. <sup>12</sup>Sioshu hingrnanhoyuk yimar rpa metrpatpno rhukfot. Rorhu yon tuhanm yak hta bohta marnyakfot. <sup>13</sup>Yimam sios hingrneft tohhato hifa hingrna marnyem, nd yimam tu dborioh yufat yakrahm. Nhai yakrmi hanyruhatm rom Jisar hikwa yuhat wommpno kfo pthaneft.

### **Bro Nkifrarhu kafrohet mrokfot tafont htamort**

<sup>14</sup>Ninpno nianeft bi yibon hanita, ndar gontwat be wandfiwant.  
<sup>15</sup>Kanga na nia duha yinyeft o awi knga hatohneft, ndar gontwatin bi mrokfom yakrahnm nom Bro Nkifrar hiket yimanmoh toh yuham. Nom Bro Nkifrar hikwa tuhan yindarinom, nom toh nkifraniruha Bro Nkifrarhu yon kunyenom. Nomn dany rahur kanjo nd Bro Nkifrarhu

yafothet mrokfot hatohwonomt. <sup>16</sup>Rpa yima yuhuri rpa tngr nom rpat tohhato kfo pthafkfot Bro Nkifrar nom yak nuhasmo tu yafothet mrokfothu mnat. Nd mro-kfothu mnat inji kroht:

Tu yima mif that yaknehato,  
mifik dborhamotr,  
tuhant yindars htimomr.

Ror tu mndohmb yima mifr tohmor.

Nhai wom tamoh nefenr rhurmorr.

Ndm Bro Nkifrarhu Yafothatn yak nuhasyukem.

Mounmotm hti bugamomr.

Rorhu mrokfom yimam yaknimomm,  
kmi kmi kfo ptha habrimomm.

Ndar bbinysoftu yimam wany yakiomomr.

Bro Nkifrar yura hamuhmorrn,

bro yufat hemorrh.

### Giaman tisaroh mrokfom

**4** <sup>1</sup>Bro Nkifrarhu Yafothat mrokfom kfo hik twanho mifwotm. Bi wuroh yihar brboh hniwatr, yimam Bro Nkifrar kfoyuk mrokfo yuham myak htanitmm. Myak htanihato tfit nd yafotham yimam tuhagrhhahato kfo ptha nhehwa yafotharoh mrokfomn o kmi yarhm kfoyuk mrokfo yuhamn hikwom. <sup>2</sup>Ndhtet mrokfom giaman tisamn hnewumm. Ndhtet yimaro yima dukefr, tamoh nefm yak nhtiwar, bi nohmorio. Rom nayuk fasoh nefm nhai wom duka mekahm art fasoh nefet. <sup>3</sup>Ndhtet yimam kfo ptha kangm tuhan yakneft ndt fasohet, yo mur yeshrt ye fura bofuraneft ndt fasohet. To nd yemrote be tum dborha furamom? Na kanga nmoh yeyukmn Bro Nkifrar hingrna htamorm. Yimam bi Bro Nkifrar hikhato rorhu tu yafothet mrokfot yakitohetm kfo bruttnahato yanyeft nhai mrokfom. <sup>4</sup>Tamoh tamoht, Bro Nkifrar ndar bbinysoft htamat, dborioh dborioh shrkarpar htamor, nom nhai kfo kurkfot. Bro Nkifrar kfo bruttna yindhornihato yak yakfot. <sup>5</sup>Bro Nkifrar bi kfo memor, “Nd nd yeshrim wayetwako.” To nhai nom kfo kurkfot. Nom nd yeshrim kfo bruttnahato yenyeft, nhai mrokfom.

### Timotir Kraisru dborior hingrna yimar tohkfot

<sup>6</sup>Ndar mrokfom yaknihato wom Kristenm kfo nuhas bonuhasrahnm, to be Kraisru dborior hingrna yima tohrahn. Yo nd ni hikwa gutnius mrokfoti sios yahuka kfo yirmoh mrokfomn tpim habokknarahmn.

<sup>7</sup>Mirahn nd bro yimam harhuwa nkifra tndh furam ayaka. Bro Nkifrar tohwa toheft watoh hik hanywontwa. <sup>8</sup>Yimam wumtt yinyeft nhai be bmbri wumtt yi yaknikahm. Afo tum wumtt-hato baruhat hatone nhombrahato tum nahti nhombra nahti nhombra tamoh wumtefm

bi tu hifa hifa fekmm, ee btn wumtt kitm. Kangn Bro Nkifrarhu toheft atoha, to nd wumteft kanjo afo tu toh nhombrakfot. Afo tu toh nhombra bonhombra hanyhato bi tu hifa hifa tu Bro Nkifrarhu toheft kanjo tohwo, ee ni bi nhai mrokfom. Nd hifa hifa rhu yuham bi hikwonm. Kto hifa hifa rhu nkifra-nirahn. <sup>9</sup>Ndar mrokfot tu kfo mif kfoyet. Yimam wany yakiohato hikkfot. <sup>10</sup>Yimam bi fasoh tkitm tohetm, toh nkifraniyet Nkifrar kekworm. Nhai frohm yakkahr. To nd rorhu mrokfom wany yakiowamn kekwor. Ndnetnom nom rorhu mrokfomn wany yakowanom nmoh dukefm rorn kitwom, kangnom rorn yak marnyarahrnom. Yiha yiham to be kangnom, Bro Nkifrar tohwa toheft atoh hiknom.

<sup>11</sup>Ndar mrokfot wakfo nuhas-nikahnm yo tfit wakfo hik nuhas bonuhastwanm ndar mrokfothu hik yuham. <sup>12</sup>Ni damiag yimaye. To mirahm ni damiag yimann wahtinomn yonenm kanjo. Ni tu yimam kanjo tohhato wom Kristenm ni htiyak hanyruhamn hikrahm. Ni pthayuk mrokfom, ninhu yau nmbuham, yo ninhu yima yak marnyaneft, yo Bro Nkifrarhu yakitoh kihneft, yo ninhu toheft, watoh hikkahnn wom Kristenm inji htiruhamn hikrahm ninhu toheftn. <sup>13</sup>Na nhai bmbri niakahane, afo ninn bro yima rifinr ritimyuk mrokfom ritimtwanm. Ritimhato wakfo nuhas bonuhastwanm. Yo kfo hta bohta mrokfom wahitwanm. <sup>14</sup>Mirahn ariwohsisaka Bro Nkifrarhu mrokforoh pthaneft. Eldam tir hta hanyhato kfo ptha hanymoa mrokfo yafothar to bi ninn muhmor. <sup>15</sup>Ninhu dukefr nd na kfo hta bohtayuk mrokfomn dukefr htahato hingrnakfot. Hingrnefr hingrna marnyaruhatnr wom Kristenm htiruhamn kfo mirahm, awi hifa hingrna marnyewur. <sup>16</sup>Ni tunhu toh nmbuhat htiyafu hany yo wom Kristenm yak hta bohtiwa yuham htiyafu hany inji nakfot. Inji na hanyrahn, nini ninhu mrokfom wanyuk yimam Bro Nkifrar toh raforahrko bro kotkfot tohruha yihart.

### Wom Kristenmpno tohnefthu kfo nuhas mrokfot

**5** <sup>1</sup>Mirahn wom yima bebpar be mfro akfo huttanr. Tamohm kfo pharuhanh tunhu yifem mifr kanjo inji kfo ptha yima boyima marnyakfot. Damiag yimam nhaf inji. Rom tunhu garbn nmemrom kanjo yak marnyakfot. <sup>2</sup>Yo met bebpas yo met tmaht nhaf rpahtet neft nakfot. Met bebpas tunhu hiyau mmemt kanjo yak marnyakfot. Yo met tmaht tu hifa dborioh wutha yima yuhurpno tunhu mndarem mif mift kanjo yakitoh marnyakfot.

### Yindarim noh htaniyet metroh mrokfom

<sup>3</sup>Wom mett ramemr noh troh htanitrt turpat rhu kutenwot, ni hti marsisa duha. Tamoh tamohm hti dukakfot. <sup>4</sup>Nd met dhirt yonetet o inyenem yonetet, ninn yihato kfo mekfot, “Niko mirahko nd met dhirt ahti marsisanomt. Wahtiyaf hany-swakomt tamoh tamohm.” Nd mmemt

nd yonrhu inyangur bebt harhumohat tawo rot finji rhu bebwot nd yonr hti dukakfot. Bro Nkifra inji nayet yonm hifa hti yindhorworm.

<sup>5</sup>Ramemr noh htaniyet mett nhai womm hti dukakahmt, nd metthu yima yuhur Bro Nkiffrarn naku kfiwit. Yiha yiha yifung marm Bro Nkifrar naku kfo hasiwatt rorn kukatohwort rothu rhu nmbuhat. <sup>6</sup>Wom mett ramemr noh trohniyett be tuthu thatipthu tuhagrha yima yuhur korhrt, nd mett be bi sfnoh thatip furayet. Nhai wom Bro Nkifrar rhukahrt. Bi hel yita yihotatn kauwot. <sup>7</sup>Ndnettн yindarim noh htaniyet metm nd mrokfom wahikahtnm Bro Nkifrar akfo brutnakahmn be hifa yima yuhurpar yauruhamn nhai riruh arhuyukm faso kfo bebruhatmm. <sup>8</sup>To afo wom mrokfot wawanykomt. Wom Kristen yimar nhai turhu froh frohm o turhu yon tuhanm o turhu darbn najomrom o nmemrom o mndaremrom hti dukakahrm, nd yimar bi Bro Nkifrar mong trohwor. Bro Nkifrar hik duha yimam niwa nefm nhai be ror niwa kanjo be inji mfro nakahm. Ror be tu faso yi mifwor.

<sup>9</sup>Yindarim noh htaniyet metroh yufam yorhwa gonborngt kangn wom met dhirroh yufam ahtakahtanm, siosn nd metm hti dukarahtm rröh rhu nmbuham, to mirahn be nd met dhir bugaroh yufam ahtayanm. Hti hanyakfot fitoh mett rpa yimarpas fak dhir htanirtn nd mett 60 gunyjimetet, <sup>10</sup>yo nd mett dborior yufetet, tuthu yonm hifa hifa fakitoh marnya hnamotm, yo wom kmim fak marnya hnamotm, yo Kristenroh bdr wuram fuk kifsa hnamotm, yo krhopet yimam krhopam titanho hnamotm, yo wom dborior dborior nefm na hnamotm, tot ndhtet metthu yufatn nd gonborngt htakfot.

<sup>11-12</sup> Yo mirahn tmah dhirroh yufam bi ayakkahanm dhir metroh yufam yorhwa gonborngt bi ahtayanm. Nd dhirm nd gonborngt yufa htaneft afo bro mrokfot kak dbkafwom. Kfo kangm, “Nom nhai tfit wom nfri ramr yakruhatnom. Nom be inji toh furahato sioshu hingrnefmn yakitohnhorah-nom.” Mrokfot inji kak dbkafwont. To nom bi htietenom metm yuhre tmahmn yindarim noh htanineft, yima yuhum tfit sinyewatmm wom nfri ramr yekwamn nd barkof yak dbkafyuk mrokfot yi firewut. Nfri ramr yaknitamn sios hingrneft htanywomt. <sup>13</sup>Yo rom niwa wom neft, rhu hhrek hasohato kuny kuny yi htfasneft. Yo nhai be hhrek nmbuharpatpno kuny kuny yi htfaskahm. Nhai. Kuny kuny kuny rhu htfas thoft to be nd womroh mrokforoh hatone htfashato rhu ptha htfassn inji rhu htfaswom. Womm rom turoh mrokfom rom tumn pthayukm, to nhai, nd metm be turoh mrokfom kanjo romn tfit nndo mando faso faso harhu htfaswomm wom yimam. <sup>14</sup>Ndnettн nanhu dukeft duka kanga fitoh metm yuhre tmahmn yindarim noh htanimm, nd metm afo tfit nfri yindarir yakkfot. Nfri yindarir yakhato afo nd yon mtitofr afo yakitoh hanyhato tu bro yon kunyet metroh hingrneft afo yakkfot. Inji naruhamn nd nom hti dbnotwa yimam nhai yarim tohnehato wom tng

bebm turuhatmt. <sup>15</sup> Wom met dhirm to bi tfit mkekutakhato Satanr tfit hikwom. <sup>16</sup> Fitoh mett Bro Nkifrar hikwatin rothu frohemtn dhirt tohwot, rothu mmemet o najomet o nmemet o wimar-somet o yimboremet o tamohemet, to miraht nd mett be nyngarpaye ayukatoh marsisahtanm sios kforpatn ayakitohtm. Nhai. Rotn nd tuthu yimatm yakitohtkf. Fitoh met dhirm nhai yimat duhatem, nd metrpam sioskfot yukatohrahtm.

### **Dborioh hingrnemf hingrnayet eldam yakitoh marnyakfot**

<sup>17</sup> Eldam tu bro hingrneft kakitoh-wom. Romn tohhato Bro Nkifrarhu mrokfot kfo pthiwatmt tuhant yindars wanukmt yo romn yimampno rhuhato kfo hta bohta mrokfom kahukwomm. Ndhtet yimamn tu yura wuhtahato bro yufati marufat hekfot. <sup>18</sup> Bro Nkifrarhu rfa borngt kfo kangt, “Bulmakaur wit yukham kahot krhe-wurm, mirahn tngt akitasifkahtanr ror yi yak hany juha.” Yo “Hingrnemf hingrnayuk yimam marufam yakkfot.” Ndnett eldam hingrnaneft rom marufam yakkfot. <sup>19</sup> Wom yimar eldar pno wom kfo wok mrokfom kfiwurm, ni bi mirahn rorhu mrokfom awanyanr. Hus o husfirpa yimam rpahtet mrokfot nia kfo pthewum ee wanykfot. <sup>20</sup> Wom eldar wom fasoh nefm ner, nd eldar yima nyngia riarpno kfo nyngia fnahkfot. Wom eldam inji htiruhamn yakrmirahm rom fasoh nefm nanef.

### **Timotir duka marnyahato tamoh tamoh nefm nakfot**

<sup>21</sup> Bro Nkifrari Jisas Kraisr ee Bro Nkifrar yak htamo mounmotm, yukatoh hanitatma na kfo mifwann, na kfo nuhasyuk hingrnemf yima dukefrpno wahingrnatwanm. Tamoh tamoh nefm niwa, mirahn bro yufet yimarpami tunhu yimatrampno dborioh nefm ayak nuhasa. Nhai. Yima bugam rpahtet neft yak nuhaskfot. <sup>22</sup> Bi mirahn Bro Nkifrarhu hingrneft yakitohyuk yimam tafi hti hik marnya duha bi tir hta dimandi-yakniyanm. Hti hik marnya duha tir htanihato kto nd yimarhu nefm tafont rhurahm, tfit ninn mrokfot thutitarahm. Ninhu yufat mrokfo duhatt rhukfot.

<sup>23</sup> Nd ninhu yatiyefr yejborhewohate mirahn be buparpam ayeya. Wain bupenmpno hta hmbrihato wayekahnn yatiyefr thu jubtwarahrn.

<sup>24</sup> Womroh fasoh fasoh nefm tafont nriyafwtm htitwonom. Htihato kfo kangnom nd yimar mrokfetr rhurahr. Womroh nefm be rhu kafroh marnye-wum, kto nriyafruhatm htirahnom. <sup>25</sup> To be nd yuhatn wom dborioh nefm tafontn htitwonom. Wom dborioh nefm nhai tafontn htikahm kto nriyafruhatm htirahm.

### **Slefm be dborioh nefrpam nakfot**

**6** <sup>1</sup> Kristen yimar wom yimarpno slef tohwor, nd Kristen slefr be turhu tohak yimarhu yinhitn tohhato bro yufat htakfot. Nd Kristen slefr

inji na marnyaruhatr be rirhu arhuyuk yimam nhai Bro Nkifrarhu yufat faso faso kfo beb bobebruhatmt. Yo nom Kristennom hikwa yirmoht nhai faso kforuhatmt.

<sup>2</sup> Fitoh Kristen slefrhu tohak yimar Kristen yimayer, to be nd Kristen slefr mirahr fasoh tuhagrha dukefr yak-kahann akfo amiya, “Nhai mrokfom, nanhu tohak yimar Kristen yimayer. Na finji naneft nhai kforuhatr.” Mirahr inji adukaya. Be yiro yima yuhurio riyindhor mekfot, “Nanhu tohak yimar hifa Kristen yimar.” Ndhtet yindhor yima yuhur rirhuhato turhu tohak yimarhu tamohtet hingr-nefm yakitohhirahrr be hingrnefm yi marnyarahm.

### **Giaman tisaroh fasoh fasoh nefm**

Nd na bi kfo hta bohte mrokfomn Kristenm wakfo nnhutwanm nd mrokforoh hikneft. <sup>3</sup> Fitoh yimar mkfoyuk kfo yirmoh mrokfom nhai niko sios wanuka kfo yirmoh mrokfom kanjo hikkahm, yo nhai nmoh Nungothet Jisas Kraisrhu mrokfom kanjo hikkahm, <sup>4</sup>nd yimarhu yima yuhur bro yufathu yakneftn yima yuhur buriwurr. Nd yimar dukef duhater. Sfnoh mfra nyisofer, nhai yima dukefr rhukahrr. Nd tefi shrkenroh mrokfompno rinahtakhato nakfo hamuh nakfo hamuhneftn buriwutr. Ndt fasoh neft kakitohwor. Nd neftn hnnewutm womroh wuskar o tamohr htihato yima yuhu sinyaneft, nakfo yiritineft, nungurha mrokfo nahanyeft, hifa nyingga nahti duha, <sup>5</sup>kfo baboba-neft, ndhtet nefm yakitohet yimar nhai tu wom dboriorh yima yuhur rhukahrr. Yima yuhur tu faso rhu beb mifworr. Bro Nkifrarhu yafothet mrokfot nhai ndhtet yimar wom rhukaht. Inji newa yimam duka kangm, “Bro Nkifrarhu yirmoh mrokfot kfiwa yuhat toh hikruhanomn marut, wuss, yo tamoh tamoht niayuk yihotat yak didbhatakrat burifhut kanjo.”

<sup>6</sup> Be Bro Nkifrarhu kfo yirmoh mrokfom hikhato nhai be mfro dukakahnom bok maruti wussbu harhuneft, nmoh rhu nmbuhat rhu marnyarfonomt. Nhai tamoh tamohr yak kkopenrfotnom. <sup>7</sup>Nom nurmohat nhai wom tamohr yakitohakhato niarmonom. Tfit nom ndar bbinysoft htanyhato yi shoft nhai tfit wom tamohr yakitohakniruhatnom. <sup>8</sup>Dfik yeshriyenm korhmnom o dfik hmbresham harhuwonon, to be ndrpampno rhukfot. Hti tmany juha. <sup>9</sup>Yimam mfro maruti wussbu yak dukefr mfro rhuneft, bok dukefm kekwomm. Bok wuskaroh yak dukefr yekwatrm be tumn fasoh tkitt htewum. <sup>10</sup>Mfro maru dukefr yakitohneft, tot ndharn boknambok dukefm mfnah-rahm. Tot tu fasoh nefm sinyewa mnakort. Yimam nd maru dukefr yekwatrm fnahnitamn boknambok krhopam kekwom. Krhopam yekwamn yima yuhum nhai hwe marnyakahmm.

### **Porr wom mrokfom hemorr Timotir**

<sup>11</sup> To ni, ni bi Bro Nkifarpno rim tohniyet yimaye. Tamoh fasoh fasoh nefm ni brbo yi juha. Dboriorh toh nmbuhathu toh yuhatn watoh

nhombra won hanyswa, yo Bro Nkifrar yakitoh kih hanyhato ror tohwa toheft toh hikkfot, yo wommpno nayak marnya-hato rpat tohnethu yima yuhur yaki-tohkfot, yo noh hmbre yima yuhurhu rhu dukefrn tohkfot.

<sup>12</sup> Bro Nkifrar hikneft resis kanjo watohwonkahnn nd toh nkifraniyuk tkitt wayakwon-twant. Nd tkitthu yakneftn Bro Nkifrar nakumorn. Bro Nkifrar nakumotrn bok yima rifiny buhar tohhato Jisasr yakmo yuhat kfo srh nuhasmonm.

<sup>13</sup> Ndar bbinysofti mount yorhwa shrkar htamo Nkifrari Pontius Pailatr-pno kfo srh nuhasmo yima Jisas Kraisr, na rof yukatoh hanitwotfa na kfo mif mifwann, <sup>14</sup> mrokfom kfo-yukm yikitoh marnyahato hikkfot. Nd kfoyuk mrokfom yikitoh hasetnn Nungothet Jisas Kraisr yawihnerahr.

<sup>15</sup> Rorhu mounthu yarim yak dborha-hato yawihna yihar, tu Bro Nkifrar bi duka htewa yiharn kforuhatr yawih-nerahr. To nd Bro Nkifrarhu tngtpno tamoh tamohr korhwor yo rorhu tngtpno tamoh tamohr rhu hik hanitwor. Rorrpar kingroh tu Kinger, yo rorrpar nungothetroh tu Nungotherer.

<sup>16</sup> Nd rorrpar nhai nohkfot. Yiro bro funa nanyjareftn frhabrimottr yiro riyorhwor. Nhai yimam brbo yikfot. Nhai wom yimar htiwonrmorr, yo nhai wom yimar htikfot. Ndnettn yiha yiha nom be rorrpar bro yufat hekfot. Rorhu bbuka nanyjareft be inji rhu nkifraniraht. To be inji.

### Maru kunyet Kristenroh wom kfo duka mrokfom

<sup>17</sup> Ndar bbinysoftu maruti wuss mfro haruhet Kristenm wakfo pthawtanm, mirahm turoh maruti wuss htihato akfo yindhor hagrhanom. Mirahm nd mibatinita shrkarn rroh dukefm ahtanomm. Bro Nkifrarn rroh dukefm htakfot. Nd Nkifrarn kahuk-wornom tu bro yindhorefthu rhuyuk wonk wonk shrkar. <sup>18</sup> Wakfotwanm, mirahm turoh maruti wuss htihato akfo amanyom, asot be tu dborioh rhu nmbuhat rhuyukt. Nhai. Mirahm inji adukanom. Tu rhu nmbuhathu yakneft, dborioh nefm yikitohhato womm tamohm kkopenwom, htihato yak hekfot. <sup>19</sup> Inji narahm, turoh rhuyuk tkitthu tu dborioh wuskarn bi thu yibmon hanitm. Kto tu rhu nkifra-niyuk rhu nmbuhat yakrahm.

### Porrhu wuroh mrokfom Timotirpno nd yimom

<sup>20</sup> Timoti, nd hingrneft Bro Nkifrar ninhu tirt htamot, yonm kanjo waya-kitoh marnyatwant. Tamoh tamoh mrokfom nhai tu Bro Nkifrarhu dukef yuhatn yimam kfo pthakahmm, ni mirahn nd yimampno brbo aiya. Rroh mrokfom be yuwi Bro Nkifrarhu gutniuskfotn kangm, ayoh mrk wuna bowunanom. Rom duka kangm, ka rroh mrokfom tu yafothet mrokfom kfo pthewum, to nhai. Nndo yafotha duha mrokfom kfo ptha furewum. <sup>21</sup> Wom yimam to ndhtet yafotha duha mrokfom yikitohmomn Bro Nkifrarhu mrokfot mafafhonimomt.

To be injirpa nanhu mrokfom. Bro Nkifrar atoh natwihtwarko.